

pci

August
2017

Presbyterian Church in India (Reformed)

MESSENGER



August 6
RBI
Sunday
chibai

RBI
Building
lamna
pai lel



pci Messenger

A monthly organ of Presbyterian Church in India (R)

Vol. XXVI

August 2017

No. 07

PRODUCTION TEAM

Editor

Rev. Khen P. Tombing
C/No. 9862088190

Jt. Editor

Rev. H. Chin Thiansong
C/No. 8731850322

Contributing Editors

Rev. G. Suanzalam
Rev. Khamlianmang
Rev. T. Liankholal
Eld. T. Khupzadou
Eld. Langkhanpau Guite
Eld. N. Thangzamawi

Cir. manager

Mr. C. Biaklun

THU TUUNTE

<i>I zalenta uh</i>	01
<i>Bible bang ahia?</i>	04
<i>Nikhat Jerokou ah..</i>	11
<i>La-te thu</i>	15
<i>Laikhak</i>	20
<i>Hehna sal apan...</i>	21
<i>Voktal apan sinlai</i>	24
<i>Tualsung saptuam...</i>	27

Head Office

*Presbyterian Church
in India (Reformed)
Box -32, Hebron Veng,
New Lamka 795006
Manipur, INDIA*

Subscription Fee

Rs. 10/- per copy or per month

Website of the Church

<http://www.pcireformed.com>

A sung a thu
kisuhte editorial board
ngaihndan ahivek
kei.

*Printed, published and edited by Rev. Khen P. Tombing at Diamond Offset
Press for the Presbyterian Church in India (Reformed)*



I ZALENTA UH

- *Pastor H. Thiankhanmuan, Delhi
Presbyterian Church*

A masa in, August 15, 2017 ni a India zalenna lawm ding i hihman un, na vek un Modi tuallenna New Delhi khopi akipan in Independence Day chibai ka hon buk hi. I tenna India in gam khangthu thupitak leh sautak khat ana neita hi. Kum tampi British vaihawmna nuai ah ana om ua, haksatna tawp a tun nung un zalenna ding in nasatakin kiphinna 1857 akipan pat a om, kum 90 nung in zalenna piakin a omta hi. Hiai zalenna leh gingtute zalenna in bang sinlai hon pia hiam chih ngaihtuahtham ching hi.

History en leng, khovel pumpi theihphak ana hihna Indus Valley Civilization, kum 5000val paisa, pek ana hita hi. Khovel theihbat ahiah banah, gamdang toh kizopna hoihtak leng a neita hi. Huaiziakin, India khangthu tuh sin leh suttham ahihman in tamtakin Doctorate degree neihlohta uhi. Huan, sahkua lam ah chileng, khovel a mi'n ana ngaihsang mahmah uh Hinduism, Buddhism, Jainism chihthe piankhiatna gam ahi. India constitution bawlkhiat ahihlai in, sahkua lama hausa ahi chih theikawm in "Secularism" chih thumal ana heltel uhi. Huaituh, gindan pawl khat pepeuhte'n zalentaka amau biak chiat a

biaktheihna ding uh ngimna ahi. Independent India (1947 nunglam) a thiltung khenkhat ziakin hiai hih ngaihtuahna thuktak toh gelthak tham ching ahi. Politics ah leng suanthamching makai piankhiatna India ahi. Father of the Nation chih hial a om, Pu Mahatma Gandhi in India zalenna dinga kiphinna vanzat non-violence pankhia in, khovel pumpi sinlai hoihtak pia hi. Ei singtang gam bang ah leng Dandi March enton in ZNC makaih in Tipaimukh Road tawn in Lamka tan mi 70 in Long March ana nei ua, 1984/5 velin Thanlon khokhang, Sepikot apan ka khia Suangsang tawn, J. Phaikholumtan lampi ana sial ua, tutan inleng omlai

hi. India mi Civil Service ching masapen Pu Jawaharlal Nehru leng ‘gam itna ziakin hong kitawp’ in, politics a hon sai a, India Prime Minister masapen a hong suak hi. August 14-15, 1947 zankim a, a thugen Tryst with Destiny kichi bangin mipi lungsim lawngkha petmah hi. A thugenna a thuvual minthang mahmah khat ka hon quote ding: “At the stroke of the midnight hour, when the world sleeps, India will awake to life and freedom.” Pu Narendra Modi’ Make in India policy in saptuamte’ nasepna hon sukha mahmah hi. Himahleh, India mipi ngaihsang ahi. Survey tunaichin a omkhat dungzui in, India mipi 100 laka 70 in Narendra Modi makaih Central Government ah muanna nga uh ahi (khovel a percent sangpen), chi uhi. Dik mah hi dingin ka gingta, eiloi, chikmah a Hinduism toh mekmat ziaka BJP deihloute’n leng, a chinna ding un sihngam in I kalsuanpih theita ua, a makaite uh leng thupitakin I na vaidawnta uh. Modi khuak in ei minamte leng hon zen-ngeingei lel ahi chihna ahi. Banah, India hih nam tampi tenkhawmna, tawndan (culture) hausatak nei ahi. Tulel in, India ah mihing 130 crore vel om a, pau 1652 om in, minam 4635 om hi.

Ei omna Manipur State kia ah leng tribe 33vel ki omkhawm hi. Hiai mi namte tengteng adia zalenna kibang zalenna tuh India makai masate’n hon ngahpihta uhi. India in zalenna a ngah ding lai in slogan poimoh mahmah khenkhat ana kigen a om hi. “Vande Mataram” Bankim Chandra Chattopadhyay; “Jai Jawan, Jai Kisan; Long Live Youth, Long Live Farmer” Lal Bahadur Shastri leh “Jai Hind” Netaji Subhas Chandra Bose chihte ahi. Hiai slogan kislamte’n mipite a tokling ua, lungtang tawng akipan suakkhia zalenna lunggulh in neisak zou uhi. A kalsuanpih mipite’ thahatna ziakin India in zalenna a muta hi.

Achihleh, zalenna sualtute’ ziak a India in Independence Day 71vei a zat lai in, ei Manipur singtang mite dinmun bang ahia...Independent I hi taktak uhia? I nam heutute’n hiai thu khong hon suakkhia hi le uh navak huai mahmah dingin ka gingta hi. Kei ana etdan in ahihleh ki zalen nailou, zalenna le kideih ngap nailou; huai omdan tuh, a deihlou mawk a kihikei a, aman (price) piak ki ngaplou chihna ahi. I gam India in zalenna lawm mahleh, eite’ I zalen tatak tuankei uh. Himahleh, Jesu Khrist in eite

zalenna a hon piak tuh mimal chih sukha zalenna ahi. Full liberation (kuamah a ki nga nonlou a zalenna bukim), gam leh namte zalenna tunglampek a zalenna ahi. Jesu Khrist in zalenna hon piak bang hihiam chih saulou in enkhawm ni: 1. Satan thuneihna akipan zalenna Satan nasep tuh mikhem ahi. Gen. 3 ah Adam a khemzou hi. Mat. 4 ah Jesu Khrist a khem nawn a, himahleh huai ah a lohsamta. Hiai hih eite a dinga thu kipahuai (good news) ahi. Satan thuneihna nuaia omlou dinga Jesu'n eite zohna hon peta, a thuneihna akipan zalenna hon peta ahihman in, Khrist ah SUAHTAKNA om ahi chih phawkthak ni. Zalenna tuh Khrist a om ahihman in, nang le kei Khrist a om mite I zalenta uhi. "Huchiin, Tapa in sal apat a hon suahtaksak leh, na suakta petmah ding uh" (Johan 8:36). 2. Khelhna saltanna akipan zalenna Jesu Khrist in Satan apan suahtakna hon piak kia hilou in, khelhna sal akipan inleng hon zalensakta hi. 2 Korinth 5:17 in: "Mi kuapeuh Khrist a hong om Chiang un thilsiamthak a hita, thilluite a mangta, ngai un thil tengteng a thak vekta" a chi hi. I omdan luite uh, khelhna sal tuamtuum a I na tanna uh – kilimneih, soiselhat, phunchiak,

gensiatthai/ demhat, kinakna, mi hihlouna a hekhat, sum negu, hun negu, khamtheih chituamtuum etc...chihte ahi. Himahleh, huaite thunuaia saltanna akipan Khrist in nang leh kei hon suaktasakta ahihman in huaite tawpsanta ni. 3. Khrist deihna banga nungta dinga zalenna Ephesians 2:10 ah Khrist in zalenna hon piakna ziak a kigen hi. Huai ah nahoih sem dingin a kichi hi. Nahoih sem kichi tuh, 'Khrist deihna banga hing ding' chihna ahi. Khrist in bang dingin nang a hon deih a...mi toh kisualsual dingin maw (eilak a kithang simsim mawle!). Hilou, Khrist deihdan tuh Johan 14 na ah: Ka thupiakte zui un, hileh ka lawm na ding uh a chi hi. Achihleh thupiak thupipen bang ahi dia? Mat. 22:37 a nungzuite dotna a dawnna ah: "Toupa na Pathian tuh na lungtang tengteng in, na kha tengteng in, na lungsim tengteng in na it ding ahi" a chi hi. LOVE, Love, love... 1 Kor. 13:13 ah thil thum a om gige ding a kigen – ginna, lametna leh itna. Huaite lakah ITNA a thupipen ahi chi lai. Khrist deihna banga hing dinga zalenna piak I hita uhi. Huaituh eileh-ei I ki-it banga midangte it ding chihna ahi. Saptuam dangte leng I it ding uh ahi. Ei pau a pailoute leng

I it ding uh ahi. Huan, it ding leh itlouh ding bel I khen theih ding ahi – pasalte'n mi nu/ mi zi khong I va it uleh buaihuai ding; numeite'n mipate nava it uleh khovel buai ding ahi. Khrist itna in huaibang itna genkhalou ahi, angkawmna ahizawk ziakin. Hiai thu, Pathian' batpih a siam mihingte, Satan sal akipan hon suaktasak Pathian ahi chih midangte hilhsawn leng na hoih sem ki hi ding ahi. I vek un hiai nna sem dingin Khrist in hon lam en. Huaiziakin, I zalenna san uh zahpilhlo in kalsuanpih chiat ni. Jesu'n zalenna hon piak tuh zalenna bukim ahita. Hiai zalenna tang hinapi a Satan/ khelhna sal dingin kipe nawnkei ni. Khrist' deihna banga hing a, Pathian pahtawi gingtu hi dingin Khrist ah dingkip ni.

BIBLE BANG AHIA ?

*Pastor Khai khan pau,
Bangalore Presbyterian Church (R).*

THUMAPI: Khovel ah sahkhua tam pi a oma, amaute'n sahkhua bu zuih bik anei chiat ua, huai mah bangin ei Jesu Khrist nungjui ki chitengin leng inei ua huai tuh “**BIBLE**” ichi uhi. I theih tel sem nadingun midang sahkhua tuam juitea leng i en zual ding uh. Hindu sahkhua juite kiang ah dong le hang amau “**BHAGAVADGITA**” chi pawl a om di ua, akhente'n lah “**MAHABHARATA**” achi uhi. Huai omdan tak ahieh leh, eilawi in “Thukhu Lui leh Thukhun Thak ineih dan uh hidingin a uphuai hi.

Huan ah Mosolman sahkua juite dong nawn le chin a maute'n **QURAN** hon chih khum geih lel ding uhi. Huai banah, Jain sahkua jui mite kiang ah dong le chin leng a maua mah baihlam takin **KAPA SUTRA** chi in zahtak chitak in lou khian uhi. Sikhte'n ahihleh, amau a adikpen hileh kilawma thei in **"GURU GRANTH SAHIB"** achi ua, akisinsak dan utoh genthei pah uhi. Atangpi a amau kisinsak dan ahihleh, "Mihingte it ding" ahi. **BUDDHA** sahkua juitute kiang ah dong le hangle amau amau ate mah gen kithalawp thei mahmah uhi. A sahkua bu min uh ahihleh **"SUTRAS"** ahia, India pau lui Sanskrit in bel **"SUTTA"** chih ahia, amin khiakna ahihleh **"KHAUZANG"** (thread) chih ahi lel hi. Kum 2000 paita in hiai Buddha sahkua juitute seh nih in ana kikhen uhi. (1) **THERAVADA**, (2) **MAHAYANA** ahi uhi. A kisinsak nadan tangpi uh ahihleh, "ataka sepsuah ding kawkmuhna" (directions for practice) huai banah, "Mimal khat ngaihtuahna in mihingte dinmun bawlhohi thei chih gintakna (enlightenment) ahi.

Hiai a tunga sahkua tuamtuum juite igenna ziaq ahihleh, amaute'n kintaka alohpah geih theih bangun

ei Khristian te'n leng I sahkua laibu uh **BIBLE or LAISIANG-THOU** i chi gaihghaih na ua, I Bible gendan dungzuia ahin khaklouh nak ziaq ua, tukum I thupi uh **"GINOMTAKA JESU NUNG ZUIH KUM"** chih pen saukuam taka pialsanta hia ka kitheih manin i phattuumna uh neukha bek a omkhak a leh chiin poimoh ngaih petmah in tamlou ka hon gelh hi. Hiai danin vuallai leng a theihshiam huai dingin ka lamen hi.

- B = BEHOLD (Ngai in)**
- I = I (Ken/Ka or Kon)**
- B = BRING (Puak/Pua).**
- L = LIFE (Hinna)**
- E = ETERNAL (Khantawn)**

Tun hiai thumalte bulhtuah ni. **"NGAIIN KHANTAWN HINNA KON PUAQ HI"** Huaibanah, **HOTDAMNA LAIBU** chileng le igenkhial lawtel dingin ka kium kei hi.

BIBLE SUUT MITE SUIDAN: *Bible hi bu 66 gawmkhawm ahia, huai sungah, bung 1189 in abawng in akikhen sawn a, huaiban ah, atanga simvekin 31,173 ahia, asunga thumal tengteng simvekin 774,746 ahi chiin*

suikhia uhi. A gelh hun sung uh a tuat khiak dan un kum 1,500 (ca 1405 BC – AD 95) lut hi. Hiai omdan tak ahihleh, asuidan un Genesis 1; Thilsiam thu Mosi in agelh apan Tununga Thil hongtung dingte Apostle Johan in Kilakna bu 22; agelh tan uap ahi hi. Huai banah, mi 40 vel in Khasiangthou theihbaka ana gelh uh ahi.

CHIAMTEH DING: Hiai I thupi a izat thumal **“BIBLE” chih a hong piankhiak dan a paubul in “biblos” chih ahia, huai omdan tak ahihleh “LAIBU” chih ahi mai hi.** Huan hiai thumal “laibu” chia igen pen uh Thukhun Thak sung ah 14 vei lam tuamtuam in kigena, Bible bang hi hiam chih ichetna dingun anuai ah taklang ni uh.

Matt 1:1 Jesu Khrist khangthu bu
Marka 12:26 Mosi Laibu
Luka 3:4 Jawlnei Isai thu bu
Luka 20:42; Nasepte 1:20, Sam Laibu achi.
Nasepte 7:42 Jawlnei Laibu a
Philippi 4:3 Hinna bu a min tuangte
Kilakna 3:5 Hinna Laibu
Kilakna 13: 8 Hinna Laibu
Kilakna 17:8 Hinna Laibu
Kilakna 20:12 Hinna Laibute a kihonga

Kilakna 20:15 Hinna Laibu a kigelh

Kilakna 21:27 Hinna Laibua min gelhte kia a lut ding uhi.

Kilakna 22:19 Hiai Laibua kigelh Hiaite itheihciam louh ziaktak uh hi dingin ka ngaihtuah vungvung sek hi. Apaita May ni 7 nia, ei Manipur singtang gama Pathian thu a hong lutna Kum 107 bang I saptuam chih un lawm sauhauh zozen na hanga Bible bang hi hiam chih teltaka I theihlouh ding mahmah uh lain kon tak lang thakthak ut lai hi. A banah khenpi 5 in khensawn lai in, huai akhenpite ahilhchetna a Bible tangte athu toh thua ahihna san ah kitheisiam ni mo, aziak tuh a Bible tang kia ikoih chiangin simtuten amit hem ua melh gaih in Bible phen di don vetlouin tawmkan ziau uhi. Tua pen deihlou ihihmanin thuahtou di hi hang.

KHENPI 1na.

PATHIAN HATKHUM AHI(God Breath). Hiai omdan tak ahihleh, Pathian nasep/thilhihte a gelhtu mihingte’n Kha Siangthou tung tawna agelh uh ahia, adiklouhna himhim omloua a mapi a gelh ahihmanin **“PATHIAN THU”** leng chih in om hi. Huchi ahijjak takin Bible thu

theisiamte(Theologians) tampi te'n "theopneutos" Pathian hatkhum ana chi uhi. Apostle Paul inle ginna a ata Timothy kiang ah a hunbei ding kuan lam in Laisiangthou Pathian hatkhum ahi chih nounel taka api leh anun asinsak uh ahi chih ahilh ban ah, huai mah aman le asin sak adeih hi. Pathian hatkhum ahih dan le agelh hi.

2 Tim 3:16. *Laisiangthou peuhmah Pathian hatkhuma piak ahia, huaijiakin thuhilhna ding bang, taihilhna ding bang, bawlhohina ding bang, diktatna lama kichilna ding bangin a phatuam hi.*

KHENPI 2na.

ATHU/ AGENTHOH A HATKHUM AHI (Verbal Inspiration).

Khenpi 1 na a igen na uah Bible hi Pathian hatkhum ahi i chia adik mah ahia, himahleh bang chibang a Pathianin hatkhum hiam ? chih mi tampite dotna dia piangthei ahih man in anihna ding in **A GENTHOHA HATKHUM (verbal inspiration)** I chi se uhi. Hiai in agent up tak ahihleh, Pathian nasep Bible sunga thu tengteng Kha

siangthou thuneihna tungtawna mite tunga agen amauti ngaih tuahna leh gelna a suak hilou ahi hi.

Ka mi ngaihsang mahmahte lak a khat David Martyn Lloyd Jones WelseUK mi Pathian thugen minthang leh la ibu gelhtu pa'n hiai toh kisai agenna ah, "**A GENTOH A HATKHUM**" kichi ahihleh Kha siangthou in Bible gelhtute vaihawm khumin thuneih khum in, a thumal tanpha a a mauh pi hi. Huchibang ahihziakin hihkhelhna/diklouhna omthei dite apan a vengbit ahi chi hi. Huaiteng banah, abultaka Pathian thiltup a piansuahna leng ahi achi lai hi.

W.G.T.Shedd in "Dogmatic Theology Vol. 1.85 a agenna ah, "Kha siangthou in mi khat athathohsak chiangin, amah pen alou theiloua ahindan asiangthou chih hipah louin, huai kha siangthou kia in amah omdidan kawkmuh leh amah thutak pi a om ahi achi. I Toupa Jesu mah in leng asih dingkuan in anungjuite kiangah hiai thu agen kha hi. "*Himahleh amah Thutak Kha a hongtun chiangin thutak tengteng ah nou ahonpi ding achi hi. (Johan 16:13). Ahileh nang Thutak Kha pi na ut hia?*

2 Peter 1:20-21; *Laisiangthou a thugenkholh himhim eimah kihilhchian ding ahikei chih theimasa phot unla, thugenkholh himhim mihing thua pawt ahi ngei ngal keia, mite'n KhaSiangthou sawlin Pathian kiana kipan agen zo nak uhi.*

KHENPI 3na. I THUGINPI UHAHI (Doctrine). A masalam ah le ina genkhinta ua, May 7 ni hi I gamua Pathian thu honglut ni chiin achiamtehna nuampen dingin **“Missionary Day”** chiin kum za val lamlam ina zangta na ua, ginglou mi khenkhatin na kiang ah na thugin pentak uh bang a le nou Khristiante'n chiin hon dong phut taleu bangpen taka le chia, apatna ding pen le thei loua ngaihtuah dedu baihlam ahih manin leh akuamahpeuhmah zahlaka I om louhna dingun, huai **naupangte THU KIDAWNG abu neu “A TOMZAW THUKIDAWNG”** thupina gam a honna paisan masa I heutu muan leh Saptuam ana phutkhiatu Vung D Tombing in alehkhiak “Apostlete Thugin” ka hon taklang nuam nawn hi.

Ken ka gingta hi Pathian Pa Bangkimhihthei, van leh leitung bawlpa, leh Jesu Khrist, Amah Tapa neisun,

eite Toupa, Amah tuh Kha siangthou paisak in a om ta a, Nungak siangthou Mari akipan apiangta hi. Pontius Pilat nuaiah athuakta a, kilhdenin a omta hi, a sita a vuiin a omta hi. Amah tuh misi khua ah a kumsuk ta a, a ni thumna ah misite laka kipan a thounawnta hi; Amah tuh van ah a kaltouta a, Pathian Pa Bangkimhihthei khut taklam ah atuta hi, Huaia kipanin mihingte leh misite thukhen dingin ahongpai nawn ding hi. Ken ka gingta hi, Kha siangthou ; Saptuam pumpi siangthou, misiangthoute kithuah khawmna; khelhnate ngaih damna, taksa thohnawnta leh tangtawn daih hinna. Amen.

Apostle Paul mah in Tita vantang ginna a ata kiang ah Thugin dika kingak a pomoh dan leh mi hasotna dia poimoh ahi dan alaikhakna ah agelh banah, Kret tui kulha Upa aseh sak ten leng huaimah pansan leu a deih thu pia hi. *“Thuhilhna diktak lam ah leng mi ahasot theihna ding leh selhat mite siamlouh atansak theihna dingin, thuhilhna bangzel thumuanhuai tuh lenkip mi ahih nawn lai ding ahi. (Tita 1:9)*

1Timothy 4:6 ah, “ *Huaite unaute nathehsak leh Khrist Jesu nasempa hoih tak ginna leh thuhilhna hoih tutana na zuih thu a vak lian na hi ding hi.* Huchi ahihziakin, kingakna taklou Thuginpi a akingaklouna ding un Ephhesa Saptuamte thuhilh hi.

Ephesate 4:14. *Huchia mihingte diklouna zekhemna banga lepchiah pila khem tawmtawma oma, thuhilhna huih chitenga langkhatlangkhata sep leh mutlengleng naupang ihih nawn louhna ding un. Thugin hoih tak neih hi nak poimoh lawtel ahi chih ahon sinsak hi.*

KHENPI 4na.

ADIKLOUHNA OMLOUAHI (Inerrant or Infallible): Systematic Theology gelhtu minthang tak Charles Hodge hi 1797 in Philadelphia PA USA ah apiang a, amah hi American Presbyterian theologian chia theih in om hial hi. Aman a Systematic Theology Vol 1, pek 153-168 kal a agelhna a thute tamlou i en ding uh. Bible hih adiklouna himhim omlou Pathian thuneihna thutak ahi a, huai tuh Pathian Thu leng a kichi hi. Ahangbel, Kha Siangthou

hatkhum a amaute (agelhtute) tunga piak ahihmanin, mihing thu banga sang hilou in, Pathian vanzat mihingte tunga tawna a hatkhum a mah (Jesu) iteih nading uleh I san theih nading uh ahi hi. Apostle Paul in Thessalonika Saptuamte kiang ah leng “Mihing thu sang hiloua, Pathian thu bang taka asan theih ziaak ua kipahtu gen hi. *Huaijiakin, tawplouin Pathian kiangah kipahtu ka gengen uhi. Pathian thu koumaua kipan a na muh uh na sanlai unleng, mihing thu sang bangin na sang kei ua, Pathian thu ahihna bang taka na san jawk jiaak un, huaituh Pathiana ahi hima, gingta mi noumau sunga sem jel mah ahi. (Thessalonika 1:13).* Huailouin, Masa mi Jakeh tapa Agur in le Ithial leh Ukal kiang ah, Pathian thu hi **ADIKLOUNA himhim omloua ettel ahi chih agen hi.**

Paunakte 30:5-6: *Pathian thu chiteng ettel ahia, amaha muangte adingin LUM/PHAW ahi. A thute ah behlap ken, ahonsal dia juatheia muhin na omkha ding. Huai banah, Sam gelhtu in le “Na thu kigawmkhawm tuh Thutak ahi a, na vaihawmna diktat chiteng*

leng khantawnin a om nilouh ding hi. (Sam 119:160)

Thukhun Thak ah I Toupa Jesu'n leng ana gen lai hi. **“Lei leh van a mang dia, Ka Thu ahihleh amang kei ding achi hi. (Matthai 24:35; Marka 13:31; Luka 21:33)**

KHENPI 5na.

PATHIAN KILAKNA AHI (The revelation of God) :

Kilakna a pau bul taka I et leh **“apokalupsis”** chih ahia, huai omdantak ahihleh “asitna hongkhia, hawkkhia, Thil genkhiakna” chih ahi hi. Pathian Kilakna bu chih omdan tak ahihleh, I Bible sung pumpia mihingte tunga Pathian kilakna dan pen tak gen ahi. I Bible tawpna lam a Apostle Johan in ana gelh Kilakna Laibu pen “hun hongtung dingte genkholhna kia hilouin, nang leh ken bangchia I Bible tungtawna Pathian muthei di ihi hiam chih lam ahi jaw hi.

Hiai thu toh kisai Charles C Ryrie in ahilhchet danin, “Kilakna kichi tuh Pathianin a siamsa mihingte **toh KI THUZAK TUAH THEIHNA** dia a

thugenna ahi”. Ahihleh, bang chidana kithuzaktuah thei ding ihi ua chih simtu deihtakte a dingin dotna omthei khat suak hi. Aman (Ryrie) in agenzom zelna ah, hichi in I theihshiam theih nading un vualsuk deudau hi.

1. Thilsiam tungtawn in (through nature) Romte 1:18-21; Sam 19;na
2. Ahuntaka thiltung toh kisai in (through the providential dealing) Romte 8:28.
3. Khovel kepbitna tungtawn in (through the preservation of the universe) Kolossate 1:17
4. Thilamdang tungtawn in (through miracle) Johan 2:11
5. Tangtaka kithuzaktuahna tungtawn in (though direct communication) Nasepte 22:17-21)
6. Khrist tungtawn in (through Christ) Johan 1:14.
7. Bible tungtawn in (through the Bible) Johan 5:39.

THUKHITNA: I thukhitna ding un Goa a Bible ka vazilna PTS (Pastor Training Seminary) achawmtu pa Dr John MacArthur in Kilakna toh kisai agenna ah, “Amah Pathian mahmah in panla a siamsa mite kianga amah kilakna

ahi. Akhenchiangin, thisiamte tungtawn in, a khenchiangin muhlawkna (vision) in, akhenchiangin mang(dream) in leh Jawlneite tungtawnin agen hi. Bangteng hita mahleh, amah hong kilakna buching pen tuh, **Bible tungtawna thu dik zonkhiakna**

ahi. Huaituh tulai pauin (through the proposition of the Scripture) akichi hi. (1 Korin 2:6-12).

Huaijiakin, u le nau simtu deihtak te aw hiai na thusimna uh tungtawn in I biak Pa Pathian in amah thuksema theichian dingin honvualjawl chiat ta hen. Amen.

***Nikhat
Jericho a Zakai
toh
kimuhtuahna...***

By/ Pastor TK Shyam Valte,

“Ngai in, Toupa, ka sum kimkhat tagahte kiangah kape dinga; huan, kua lakah leng thil bangpeuh Na negu taleng, a leh liin ka din ding, a chi a. (Luke 19:8).

Thupatna: Damsung a kimuhtuah pih diing in kua na deih pen a? chi kidong leng I dawnna uh tuam chiat diing in ka gingta hi. Kentuh damsung a kimuhtuah pih diing in Jesu Khrist hoih kasa penpen hi. Banghang hiam I chihleh Jesu Khrist toh kimu-tuah peuhmah in, kikhekna nei teitei uhi chih Zakai hinkhua apan kichiantak in a muhtheih hi. Zakai hunlai in mite'n, Zakai leh a seppihte huat chitak in hua uhi. Himahleh Jesu Khrist Zakai Inn a hongtung in, Zakai hinkhua ah kikhekna thupitak hongtung hi.

Zakai kua ahia: Zakai I chih Jericho khua mi; siahdong(eipau in genle *tax collector* a chihtheih diing hi) makai leh mihausa mahmah khat ahi hi. Jesu Khrist toh akimuh tuah ma un; *mi kideih khop, sum kia deih, midang nei-leh-lam enlah, midang tung a tatsiat poisalou, diklou tak a sum muh leh zeek poisalou mi ahiah ban ah, dik-lou tak a sum-leh-pai zat poisalou mi khat ahi.*

Jericho khua: Jericho khua ah tum sing tamtak om ahihman in, hiai tumsingte zuak in khosung mite'n, nehmuha diing in zang uhi. Tua ahihman in siahkhonte a diing in zong; sum muhna hohtak suak hi. Banghang hiam I chihleh Amaute'n, tua tumsing zuakte apan in siah (tax) tampipi la uhi. Tuahang in Siahkhon lamkai peuh mah khosak haksa lua om ngei khollou hi (*Tulai in eigam ah leng tax collectorte himhim mihausa lou leh a neizoulou lua omlou uhi. Aneih mahmah hang un, mite kipahpih luat, om khollou uhi. Tuabang mite'n Jesu Khrist toh a kituah diing uh kisam hi*). Tua hang in siahkhonte (Tax collector), mite'n mupeih lou leh mikhial penpen in koih uhi.

Tuabang a hihlai in Jesu Khrist, Zakai inn a tungdiing a alut in, mite'n "...*Mi khialte kianga tung dingin a lotta ve, a chi uhi*" (Lk 19:7). Judate muhdan in Zakai mihausa tak himahleh mite'n koihna khat a neih uh ahihman in kuamah in kikholpih diing in ngai lomlom lou ua, a inn a hohmaimai leng mikhial leh siangthoulou bang in kingai uhi. Tuabang lomlom a mite'n a nelhsiah uh himahleh, Jesu Khrist A inn a hongtun in Zakai hinkhua ah, kikhekna thupitak hongtung hi. "*Jesun, akiangah, Tuniin hiai in ah hotdamna a hongtungta, amah leng Abraham tapa ahi ngala. Manghangte zonga hotdam dingin Mihing Tapa a hongpai, ahi him hi*" (Lk 19:9-10) a chi hi. **Bangziak a Zakai in Jesu muh sawm ahia:** Jesun Khebaite, Mitdelte, Zengte, Damloute leh thillamdang tamtak a sepsuahte a theihziak a Zakai in Jesu muhteitei sawm ahi hi. Himahleh Jesu Khrist baihsam tak in mutheilou hi. Banghang hiam I chihleh:

1) Mipite ziaak in: Mipi tamtak Jesu Khrist nung honzuite, Jesu Khrist gingtate hiding un a gintak huai hi, banghang hiam I chihleh Amah gingta loupin in mipi

huaizahzah in gimtaktak thuak in zui peihlou diing uhi. Jesu nungzui mipi sahluah mahmah ahihman in, Zakai in Jesu Khrist baihsam tak in mutheilou hi. Tulai in I gamsung uh I etleh, Jesu Khrist mitamtak in I lal-leh-Hondampa dia I santheihlouh na ziak uh; gingtute ziak ahihna tampi tak muhtheih in omta hi. *“Mahatma Gandhi in Khristtianta mukei leng Khristtian kahi diing”* a chihbang ngaihtuah tham ching mahmah hi. Manipur a Ginglou mite’n *“Gospel thu Inn kihalsakte kiang ah vagen un”* chi uhi. Huaiziak in I gamtat khohei ah gospel daltu I hihkhak diing kuapeuh kivel thak chiat di’n I kichial ahi.

2) Zakai mineu ahihziak ahi: Laisiangthou a I muh bang in Zakai mineu mahmah hi diing in a gintak huai hi. Mineu in amah sang a sangzawte leh mipi lak apan Jesu Khrist lampi a hongpai mutheilou diing mah ahi hi. Tulai in eilak ah leng, mihoih lou pen a I koih uh, Drugs addicte, Natna hoihlou veite, tualthatte, Angkawmte, Gutate, Piangthak loute’n Jesu Khrist hondampa dia pom diing haksa sa diing uhi. Himahleh Zakai bang a, muhteitei

sawmte’n zaw Toupa musek uhi. Kikhom gige te kia piangthak thei diing a I koihlouh ua, kikhom ngei mawngmawng lou a, Pathian zong te’n Pathian muteitei uhi. Banghang hiam I chihleh, Zakai mineu pan Jesu Khrist muhteitei sawm in, hongpaina diing lampi a, singkung a kalzen in na ngak hi. Jesu tuabang zah dong a, amah zongte taisan ngeilou hi. Jesu muhna diing in, Eilam apan zumna diing om hetlou a, I kipiak khiak a ngai hi. Mite hon-gen na diing kia Zakai in buaipih hileh Jesu Khrist toh kimu tuah lou himhim diing hi. Huaiziak in Jesu Khrist I muhna diing ahihna leh zumna tel hetlou a, I zon diing uh kism hi.

Zakai hinkhua apan sinlai:

1) Mihingte’n hon musit in hondem mahleh zong; Pathian in Amah zongte kimuh pih a, mikhial pen zong mihoih penpen suah thei hi. *(Tulai in Ei-te I mihoih thei lua mahmah ua, Piangthak/ Pathian adia ki lankhia thak diing I om ngei kei uhi).*

2) Zakai in, Jesun Jericho a hongphak lai in kimuh pih teitei diing a sawm a, a kimuh pih hi.

Huaiziak in, tu hotdamna diing a hun hoih I muhlai in, Pathian I zong diing uh aw. Camp, crusade, revival leh Pathian biakna diing hun hoih I neihlai un, Pathian I bel diing uh. Hun in hon liamsan nung in, bangmah na hihthei nonkei diing hi. Laisianthou in “*Hun kipahhuai ah kon ngaikhia a, hotdamna ni ah kon panpih, a chi ngala. Ngai un, tu hun kipahuai ahia; ngai un, tu hotdamna ni ah (2Kor 6:2).*” Huaiziak in tuhun zangsiam inla, na tawngtawn mun diing gel fel in.

3) Zakai in “*Toupa kiang ah, Ngai in, Toupa, ka sum kimkhat tagahte kiangah kape dinga; huan, kua lakah leng thil bangpeuh na negu taleng, a leh liin ka din ding*”, a chi a (Luke 19:8). Khrist a kikhekna diktak nei te’n, khelhna sal ah tangnawnlou diing in kipia khia sipsip uhi. Tua diing in Toupa muh I sawm teitei diing uh aw.

4) Zakai in Jesu Khrist nung a zuita hi. Pianthak leng a baihsam a, damsuang a Jesu nungzuih kichi eimah deihtelna a pai hilou in, honsampa deihna a pai diing ahi zaw hi. Jesu Khrist nung I

zuihna ah, haksatna, gensiatna, muhsitna leh pampaihna na tuah hun zong om diing hi.

Thukhitna: Zakai bang a Jesu Khrist in a khek mite hi diing in, Toupa deihna bang in na hihna peuh ah: Na office, school, college, sum dawnna, Bazar kaina, sepna peuh ah, Khrist adia Ginomtak a Nungzui hinkhua neitu hi diing in I kichial ahi. Gensiam thoh leh kigen dik sang in- I hinkhua mahmah ah; Khrist batna nei I hihna, I pau dan, I gamtat khohei leh I om dan ah muhtheih diing in, I lak khiata diing uh aw. Tua diing in Toupa’n simtute hon vualzawl chiatta hen.

Dated: 26072016
valteshyam@gmail.com

LATE' THU

Akaikhawmtu:
Rev. H. Chin Thiansong

Tutung in Laa nih leh aphuaktute leh aphuah na san uh i taklang ding uh. Huaite tuh Itna lamdang amin ngaih e chihleh Jesu a lawm hoih i neih dan chihthe ahi. **"Ina Lamdang a min ngaih e!"** Hiai la John Newton testimony ahi. Pathian itna lamdang tak mai in John Newton hinna nakpitak in akheng hi. Hiai la deihuai dan thei taktak ding in a phuaktu pa hinna i en ding uh.

John Newton kum 1725 in London khopi ah apiang a, 1807 in asihi. Apa longpu heutu ahi a, a Nu Kristian kipezoutak ahi. Ahihziak in, John Newton kum 7 lel a upaahih in a Nu'n a sihsan a, huai in alaizilna ahihbuai mahmah hi. Huaiziakin kum 11 lel a upaahih in tui pitung ah a pa a vazui hi. Kum 17 ahih in London a hong tung kikhawn hi. Longkhawl na mun a aom sung in Nungak khat melhoih salua a akiang a aom om mok leh a long in a nataisan hi. Himahleh a khawnung in a pai thei thouthou hi. Huaitung in tuh longpute سوالنا tengteng ah a telvek hi. Bangmah poisakna neilou in a pau mawkmaw a, Pathian gensiat leng poi a sa himhim kei hi. A Nu'n amah a alam-et mahmah Pathian launa

apan a taimang gamla mahmah hi. A khosakdan a honghaksat luatman in English Navy ah alut a, himahleh hun bangtan hiam zoh in huai apat a taimangta hi. A taimang nung in mat nawn in a om a, hensa in London ah a hon tonpih ua, huai ah nakpitak a khet a tuak hi. Hiai a pat in a omdan nakpitak in a hong senawn a, ginglou, thangtak a kikhahzan, kampau kih huai leh mulkim huaitaktak a pau leh hukna leh سوالنا chikim ah kidekna himhim neilou in a bualta hi. Huainung in khatvei long a zui nawn a, a ma a mahbang in tu tung inleng Africa gam toh kizom phial tuikulh gam khat ah tua a long zuih pen a taisan nawnta hi. Tu in Africa a tuipi gei a English-te, sikha a sumdawng mite lak ah a valutta hi.

Hiai ah leng سوالنا chikim ah a va bual nawn a; Bible in “Talekte lampi a haksa” achih amah tung ah a hong dik hi. Puansilh ding gina leng anei kei a, sikhate’n a an neng uh piakkhawmte ne in ahing hi. Huaiziakin, amah tuh “sikhate’ sikha” (*servant of the slaves*) a kichi hi. Amah leng a kizahpih mahmah a, a omdan zumhuai lua kua man a muhlouhna ding in. long hong pai nai a muh peuhmah chiang in gamlak ah a na kibuzel hi. Hichibang a aom lai in, khatvei sekthuk (*champra*) suanna a kilohna ah, sikha heutu khat in chiamnuih in “Hiai theite a hong pichin ua, a gah chiang un, England gam a kik a, longpu heutu a pang ahi a i na thei suante gah na hong nek mel kuan a thei a?” a chi a, John Newton bel gingtalou kisa in a nui hi.

Huchih lai mah in, London a a-nungak ngaih in, John inlam a a hongkik a, Kristian hoihtak a hong hihna ding in ana thumthum hi. John Newton’ pa in leng longpu khat kiang ah, hon zongkhia a, inlam a hon tonpih ding in athukhak hi. Hiai longpupa’n zong mu zou mahmahlou chi a atawpsan nung in tuiptiau apan mikhat in “Keileng hon tuangsak in” chi in longpupa khutvan hi. Tua mipa John Newton

ana hikha a huchiin inn lam a zuan theita uhi. Lamkal ah huihsia nasatak a tuak ua, tu mun sih lau huai na mun a aomlai un, John Newton in Pathian kiang ah ngaihdam ngen in a thum a, Pathian in a Itna dohzohna, thupitak John Newton a lak a, theihzoh vualloh a muanna thupi in a lungmuanta hi.

Anung lam in Pathian nasem ding a sapna za in, tua sapna a dawng hi. Huan, tuatui kulh gam a singnou a suanna ah leng a va hohkik kha a, a ma a aheutupa chiamnuihna bang in a gahte a vane kha petmah hi. Pathian in Newton a khelhna mulkim huaitak mai apan honkhia hi. Huchi in, John Newton in London khopi ah Pastor nna leh laphuaktu lohchingtak in sawtpi a sem hi.

A tuailai nite a Pathian in a kha a ngetna thu hichiin John Newton in a gen hi, “Gawtmun pelh theih na dia sahkhomit ngaih ahi chih ka thei khe zel a; himahleh ka khelhnate ka it luat man in katawpsan nuam kei hi. Kum 16 ka hih in sahkhua 4 vei ding khawng pom zel, tawpsan zel in ka om man hi” chi hi. Himahleh kum tampi nung in Pathian in a zou a, “Itna lamdang a min ngaih e” chih laa thupitak a hon gelhkhe theita

hi. Amah hinna in hiai Bible tang a hon ngaihtuah khesak hi.

“Na khelhnate san–au bang in om mahleh, Vukbang in a ngou ding; Sandup bang in san khin mahleh, Belam mul bangin a om ding” Isai. 1:18.

Hiai pen alamdang mahmah, theihshiamtheihhilou, ahihhang atheihchet mahmah, Pathian itna lian mahmah ziakeleu a om thei ahi. Huai ahimanin hiai laa i lungsim uah atul thei kei hi.

ITNALAMDANG AMIN
NGAIH E
John Newton

Itna lamdang a min ngaih e,
Kei bang kihhuai hon hut;
Kei ka mang khin, tu’n a hon mu,
Middel tu’n ka mu thei

Tua itna’n laudan hon sinsak,
Itna’n ka lau beisak;
Tua itna manpha lawmlawm e,
Kagintak laitak in.

Lauhuai, gimna, thang tampi lak’h
Kei ka paisuakta hi;
Itna kia hi tutan honpi,
Itna’n inn hon tun ding.

Ka pumpi leh lungsim bei dia,
Leitung hinna tawp chian;

Tua puanzak sung ah ka nei ding,
Hinkhaw nuam leh muanna.

Tuamun nuam a nibang tang a,
Kumsang sawm I bei chian;
Pathian phat la kiam lou lai ding,
Phatna ni kiam lou ding.

LATE’ THU 2-na

“Jesu a lawm hoih i neih dan”

chih la, Kristian tengteng in i theih uh, Pathian la, Joseph Scriven in lawmhoih pen Jesu a phuahna ahi. Hiaila tuh lungsim a puakgik pua mangbang, leitung a hehnemthei ding mu lou mi tampite hehnemtu ahi. Joseph Scriven ahileh Ireland gam a Dublin khua ah kum 1829 in apiang a, huaimun mah ah lai a zil hi. Kum 21 ahih in Canada gam ah a pem ua, huai ah a sihni October 10, 1886 tan in a tengden uhi. Joseph Scriven in hiai La ahon phuahkhiakna san hichibang ahi.

Aman a neuchik a kipan a aki theihpih leh a ki-it pih nungak khat a nei hi. Hun hong pai zel a tu in in piching a hong hi tuakta uh ahiman in itna buching sak ding

chi in kiten ding ahon gen lemta uhi. A kiten ni ding uh leng a sepkhin ua, moulopna ding toh kisai a thil poimoh bangkim mansa diam in a omta hi. Huchi in zingchiang a kiteng ding ahong hita uhi. Zingchiang kiten ni ding hitak toh nitaklam in, Mounu ding tuh kisil ding in lui ah ahoh hi. Kisil kawm a tui a ava kibual leh Vangtah huaitakin tui ah a hong kelum tamai hi! Joseph Scriven lungkham ding dan ei a tuak taktakloute'n theih a theih zoh vual ahi kei. Ahihhangin, aman midang khat lungkham ding dan a khualzaw hi, huai tuh a NU ahi. Pa nei nawnlou ahi a, tua azi ding tuh a nu'n leng a deihsak mahmah ahi. Hichibang lungkham mangbat hun ah, taina ding, belh ding leh hon theihsiampih ding dang kuamah omlou, i lawm naipen Jesu loungal chih khong hon ngaihtuah vungvung a, huchi in "Jesu a lawmhohi i neih dan" chih La anu hehnepna hikawm dingin Joseph Scriven in ahon phuak hi. Hiai a la phuah khovel pumpi mite lungsim khoih mahmah leh deih mahmah in a om ding chih himhim ngaihtuah kha lou ahih ban ah a Nu hehnepna ding hikawm a aphuah ahihman in kuamah dang leng a lak kei hi. A sih kuan a adamlouh lai in a invengte

amah veh a hongte lak a khatin Joseph Scriven pindan khat sung ah hiai La a va mukhia hi. A lungsim a khoih mahmah a, huai a pan khovel a Kristian teng theihphak dingin ahong kithangkheta hi. Huchi in leitung lungkham puakgik pozoulou tampite a dawnzangtu Jesu a omlam chiangtak a hilh a, lungmuanna mihing lungsim himhim a theihkhiak vuallouh a tun thei hiai la muhkhiak a hong hita hi.

JESU A LAWMHOIH I NEIH DAN - J. Scriven

1. Jesu a lawm hohi i neih dan,
I gilouh dahna paw ding;
Hamphat huai mahmah ihilh theih,
Bangteng Pathian kiang thumna'n.
A, lungmuanna tam ina tan,
Aw, nat thuaklouh ding i thuak;
Amah ihilh louh vang hi e,
Bangteng Pathian kiang thumna'n.
2. Ze-et leh khem in i om hiam,
Buaina koipeuh ah om hiam?
Lunglel ngeilou in om ni e,
Bangteng Toupa kiang thumna'n.
Tuabang lawm muan huai i mu diam,
I lungkham hon thuak pih ding;
I hatlouhna Jesu'n theivek,
Bangteng Toupa kiang thumna'n.

3. Hatlou leh gik pua'n i om hiam?
Damsung khosak ngaihtuahna'n!
Hondampa hoih i bitna hi,
Bangteng Toupa kiang thumna'n.
Simmawh leh ngilh in na om hiam?
Toupa kiang thumna'n gen in;
A angung ah a hon pom ding,
Muanna tua ah na mu ding.

KIPAHTHU GENNA

Pathian' Hehpihna zar in PCI(R) saptuam a ka na om touhtouh na uah hamphatna tampi ka na tang toutou ua, Pathian tungtawn in kon pulakkhia hi. Aziak tuh, ka tate,-

01. S. kamkhankhual, B.Com
02. Nemngaihsang, XII (Private teacher, Lungthul (L))
03. Saul Muanthang, VIII
04. War Minsang, IV

Mi a dingin bangmah pi hikei lehleng kei a dingin hiai chiang, hiai tan tung thei ka hihziak ua kipahna gen seng louhte hiai i messenger tungtawn a kon suakhiat ahi. Ka kipak.

Toupa'n tam sem semzou dingin hon vualzawl chiat hen.

Thusuahtu,-

-S. Paukhanmang & Thawngzavung
Singngat PCI(R)



REFORMED BIBLE INSTITUTE

Presbyterian Church in India (Reformed)

(Registered Under the Societies Act XXI of 1860; No. 114 of 1988)
P.O Box - 32, New Lamka, Churachandpur - 795006
Manipur, INDIA

07085645785
paugulnam77@gmail.com

LAIKHAK

Mun chih a om saptuamte Jesu min manpha toh chibai!

Tu August kha tan hon pi tung leh abiktaka RBI Sunday mel hon mu sak Pathian kiang ah kipahthu ka gen hi.

Hun Paisa leh tutan:

Awle kum 16 paisa apan in RBI in saptuam sung a khanna leh masawmna i neih theih na ding uh ngimna in training tuamtuam i sai tou uhi. RBI nasep poimoh mahmahte lak a khat Upa training (Elders & Deacons) gige in (regular) kum teng in i nei hi. Tuni chiangin i local saptuam chiat ua upate RBI nuai a training khalou om nawn lou ding hi. Heutu masate muhkholhna toh hiai bang kisinsakna (institutions) i neih uh hi hamphatna liantak ahi.

Tu apan maban ah:

Hiai bang kisinsakna skul i neih pen tu a i dinmun sang a sang zaw leh manpha zaw a i zat touh theih ngimna in Laisiangthou degree piaktheihna dia bawl touh kisawm in pan nasatakin kila lellel hi. Skul bawl na ding sum poimoh mahmah a, tua i neihsa bangzah hiam zang in kilam lel a, a vek a zohna dingin sum kidaih lou ding hi. Huaiziakin fund a hong lut zel na dingin pathian kiangah thumni.

Hiai skul lam zoh ahih chiangin huai mun pansan in tua sangin training tam zaw neih kisawm a, degree lak theihna, laisiangthou gal zilna, leh short term course tuamtuam kisai ding hi. Hiai bang i lunggulh leh tupte a tak gam i tun theihna dingin Pathian kiangah thum in ngen ni. Toupa'n hon vualzawl chiat hen.

- Rev. G. Pau Muanthang, Principal, RBI

HEHNA (ANGER) SAL APAN BANGCHI SUAHTAKDI I HIAM?

- Rev. Goukhansiam Guite.

[A living survival message]

Simtu ngaihnat huai taktakte i Toupa Jesu Khrist'min suangin itna khut taklam kahon leen masa hi!

THUMASA: Tu kha August India in gampumpi'n zaleenna a lop kha hong kitung tou guap mawk hi. Hiai hunlai apan India in i nam leh gam pumpi'pa (father of our free country India) ina chih hial un, Britist sapkangte khut apan, zaleenna ana sualsungun, hehna leh thangpaihna tampi natuaka banah, vuak-leh-satte, suangkul(jail) a ana ta'n ua, zaleenna nasa takmai a ana suallai in, na hehin thangpai tawk mahleh, thagum(force) nazang louin, thagum suahlouh (non-violence)toh, India zaleenna khovak taktak ana tun galkai pih hi. Amah zaleenna sualdan a, hehna leh thangpaihna ah kikeem siam kawm taka, lungsim diahduai dan leh Ginom taka Jesu Khrist nungzuihna ahleng, lungsim suna vilvel thei i tuahtouh jeldite toh bangchi'n machiang isuan touzou jeldia' chih tup-leh-ngim anei in, HEHNA(Anger) toh kisai in houlim lehang ichi hi. HEHNA TUH lungkim louhna etsakna ahi. Mi khenkhat te'n 'hehna' hichi'n gen uhi: ***Hehna mihing a dingin buaihuai leh kep haksapen khat ahi. Mi kilem lai asuse thei hi,***” Ahimah hi. Itna leh lauhna bangin, hehna mihingte adingin lungsim putdan (emotion) bulpi khat ahi. Piaanken dangte bangin, hehna in nna hoihtak a semthei a, himahleh hoihtaka kepsiam a poimoh hi. Lungsim a hehluatna in hoih taka ngaihtuah theihna a subuai a, thudik leh thusia deihbangin a khentheih kei hi. Taksa ading in, kisa'n ekna bang apiangsak a, sunglam ading in leng sahiang tuamtuam in a thuaklah thei mahmah hi. Mi hehhehte amai

uh asan pempuam a, pumpi ali'ng gawpsak hi. Hehluatlouhna in bel, ki theihsiamlouhna zek apiang saka, himahleh bangmah dang thupi lua a piangsak kei hi.

Mi khat in, a sawm banga nna apai keileh hehna hongpiang hi. Hehna bang ahiam ? chih gen masa photlai ni. Dictionary in, "lungkimlouhna" ana chi hi. Thangpaihna (rage) leh sinsouna (fury) aki naih mahmah. Himahleh, sinsouna a lauhhuai zawtham hi. Greek pau in Hehna chi 2in agen theih hi – THUMOS leh ORGE ahi ua. THUMOS a hihleh, hehluat mana kitom utna nei, thakhat a hehphutna ahi. Heh ek himahleh, lungkim nawnpah. ORGE ahihleh, hehna paitou zel a, a tawpa phuba lak utna neih ahi. Orge tuh meihol bangin awl khakha in, hong kitawhsuah tou a, san sesa leh sat mahmah a thuah hi. Hehna chikhat bang ahi.

HEHNA DIK LEH DIKLOU: Hehna ahihleh lungsim putdan ahi a, asia leh a hoih in a zat theih hi. Suang phoklak leh lohchinna tuipi tungah hongtung thei hi. Hehna mimal leh midang ki humbit utna ahi. Ei adia hoihloute douna ahi. Dr. E. Stanley Jones in, "**Hehna dik ahihleh, mi khat nasep**

hoihlough ziaka dahna a neihleh tuabang deihsakna ziaka hehna, Hehna dik ahi,"chi hi. Mi khat ilamet louh banga apai a, ahikhei leh ihihna suksiat a a om a i hehleh, tua hehna hehna pe'n hehna diklou ahi. Mikhat in mi dang khat tunga kilawmlou tak a nasep i muh hiam, khelhna chituamte ziaa a heh ihihleh hehna dik ahi. Hehna dik leh diklou khensiam mahmah akul ding hi. Khenkhat te'n, thutak gum akisak lai un, amau angsung phattuam nading kia sual anahihnak uhi.

Hehna diklou laizanga angsung-khualna kia a om hi. Tamtak te'n, a hehna uh akim akiang uh peuh angoh nak uh, sepna lunglut huailou, inn neulua, sum kining chinglou chih bang. Himahleh, a hehna pe'n ahihleh, ama angsung khualna a asepte deih banga apai theihloughman, mite pahtakna angahlouh man ana hinak hi. Mihingte hihna (angsongkhualna) hohtak venbit ahikheileh, amah angsung kia khualna in a dim hi. David Augsurger in hichi'n gen a, "**Hehna in a hong za hiam...ka thuneihnate zuikhial ken... ka hehna thei in, ka utut hong hihsak in**" chihite a chichi hi.

HEHNA DIKLOU BANGCHI VE'N DING: Diklou taka heh a naki theihleh, Nenniammai sawm kenla, a hehlou bangin leng kibawl tuanken. A om dandan in sanginla, hichi in, nang-leh-nang kihou in, "*Heh ka hi,*" Selwyn hughes in chi hi. Mi khenkhat te'n, *'kaheh louh ding ahi, kha mit huailou ahi,'* chi'n, nenniam sawm nak uhi. Himahleh, kuaman a nengniam zoukei uhi. Nenniam sangin lungsim a theihtheihna milmial (subconscious) na sung ah, diklou takin nna honsem a, lunggimna, Gilsung meimatna (Ulcer) sisan hatluatnate (BP sa'nna) a piangsak hi. Hehna nenniam sawmna in, tha tamtak a mawkna a seenin a om hi. I hehchiangin, hehna ziak theih a,

bawlhoih ding, khek ding omte khek a, khen theih a a om keileh, a hihdan a pomsiam a poimoh hi.

"Bang ding a heh kahia ? Bangin hichibang hehna piangsak ahia ? Bangchilel a nopsaklouna nei kahia ?" chih kidong in, Na hehna ziate theihkhiat sawmin. Na theihkhiat chiangin thuzoh sawmin. I Pathian kiang ah, kiniamkhiat takin pulak lechin, na hehna ama ngaihdamna ngen kawmin. Hichibang na hih chiangin, na hehna tungah vualzohna ahonpe ding hi. Tua a hihmanin, na HEHNA thuzoh in. Chihtakna leh Toupa panpihna in na zou thei ding hi. HEHNA tunga vualzou denthei di'n Pa Pathian in hon vualjawl chiatta hen, Amen!



Missions Huang

01. Meitei Missions Field (MMF) sung a Toupa gam nasepna lemtang leh gahsuah zaw ding ngimna in Pastor nih omte bial ding hiai anuai a bang a bawl ahi.

* Pst. R. Kumarjit: Ningthoukhong (Station) Malom leh Naodakhong

* Pst. Kh. Johan Singh: Waikhurok (Station) Nghathal, Yaiphakol, Thingkangphai.

VOKTAL APAN SINLAI

- Lianmang Munluah, Lungthul (T)

Pathian in sinlai hon piakna lam tuamtuam ah om hi. Insung bang ah, kholak ah bang leh nasepna munte khawng ah sinlai tampi hon pia hi. Ahihangin Pathian' hon piak sinlaite ngaihsak lou leh poi salou tampi ki omta hi. Tutung in Voktal apan sinlai chih thupi zang in houlim leng chi in ka hon telkhia hi.

Luka 15-na ah kisinsakna toh kisai in thupi taktak thum ana gen a, khatna ah Belam mang toh kisai ahi a, huai Belam chingtu in 99-te nusia in amangthang pen va zong hi. Hiai in khamangthang khat lungheina in van a kipahna tun ahihdan ki mu thei hi.

Nihna ah Numei khat makhai 10 nei a khat mangsak toh kisai ahi. Makhai 9 nei lai hinapi in 10 a neih lai a kipahna bang zoulou hi. Hiai in kha tuh athupi in, huan khamangthang khat pikikna in Toupa kipak sak ahihdan hon hilh hi. Belam mang tuh amah (belam) pilvan zohlouh ziaak a mang ahi a, huan, makhai tuh akemtu/neitu pilvan zohlouh ziaak a mang ahi.

Thumna tuh Tangval khat ama ut dan tak a om a, mangthang toh kibang ahi. Amah tuh mihausa khat tapa naupang zaw ahi a, ama tan ding teng la a amah thu a paimang ahi.

Hiai tangthu Tapa taimang chih in leng i theihi. Sappau a Prodigal chih tuh thangzatna chihna ahi a, hiai mipa'n noptalna hinkhua ahon zang a, huan hiai bang hinkhua a zatna ziaakin ahong ki ne kang a, ahong beidong panta hi. Huan ahong kitheihkhiak takin apa thuthu a om dingin kingainiam tak a kitahlut kawm in ahong kiknawn a, huai akisikna in kipahna leh ngaihdamna atun hi. Pathian in mihingte tuh lunghei ding in adeih a, Pathian kipahna ding a ihih theih tuh i khelhna apan kisik a Pathian kiang a kiknawn ahi.

01. Zalenna ah mohpuakna aom chih a theikhia hi: Thakhat thu a zalenna ding lunggel a neihna in kintak leh lunggel haihuai a hinkhua hihmangthang thei ding khop tun hi.

02. Thangtatna haihuai ahihdan theikhia hi: Paunak in kuapeuh thangtat atasam ding ana chih hiai ah sudik mahmah hi.

03. Hinakhua tuh haksa thei mah ahi chih thei hi: Hun teng in nuam i sa ding chih thu omlou hi. Sem lou a i om theih lai a i sep ut kei leh ut kei leng le i sep ngai teitei hun hong om ding hi.

04. Noptalna ngaihsanna tuh pichin louhna ahi chih thei : Sawltak Paul in a naupan lai in naupang bangin ngaihtuah in sem a, himahleh piching ahong hih in naupang thilhihte khawlsan hi. Vok an apiak akipan in tangval in zillai, noptalna leh nopsakna in apiak ngei louh ding theikhia hi.

05. Khovel a mi tawmchikte'n Nu leh Pa hoih bangin itna nei chih theikhia hi: Alawm hoih mahmahte'n asum ahong beitakin taisan uhi.

06. Mi beidongte'n bangteng hih uh ahildan theikhia: Vokte'n a nek uh na-ngawn lunggulhna nei hi.

07. Ki diksakna in Pathian toh hon khenlouh ding chih thei hi: Hiai tangval segawp leh hehpih huai a dingin a sanggampa (upa) tuh phattuamna bei bang ahi. Gaml;api apan a inn tunkik theihna dingin thukhenna kiptak leh Pa' itna a ngai hi. Vok an piakna apan inn muangtak a apai theihna dingin bangmah in dallou ahi chih thei hi.

08. Apa'n it taktak a it ahildan leh kipaktak a hun lemtang pelai ding ahildan theikhia hi: Khrist tanchinhoih tuh huai ahi. nang leh

kei leng noptalna a hinkhua zang/thangzat mai ding a pammaih lai i hi. Lungheina leh thumanna tuh van leh Pathian kiang i tun theihna ding a lampi omsun ahi.

A tunga point bangzah hiam i piakte apan in bang i sinkhia ale? Tapa taimang in amah tan ding teng la a nuamtak a hinkhua zang a, asiamtu Pathian phawklou a aom a, haksatna atuah ngeilouh ahon tuah apan i gen pointte ahon musuah a, amah adingin bangmah toh tehvuallouh hamphatna thupi pen atang hi. Tua mah bangin eite leng i hoih louhna, i khelhna, thangtatna leh angma sialna toh hinkhua i zat a, khovel sum leh pai toh vaihawm thei i ki sak lai in bang sinlai i sin ding i mukhia a?

Abul a i gen bangin sinlai ding i muh hangin amulou leh adiklou ahildan tangkoupah ngamloute ihi lai a, lungkham huai hi. Huaiziakin tua kipan hiai Tapa taimang in sinlai tampi mu a, kisik a thou a, alei pathian a Pa leh tung Pathian' mitmuh a khial ahihnate thei a kisik a, akik nawn bangin eite leng kik lehang i ki nep bangin eite hon ittu i Pa Pathian in hon na pom dia hon kipahpih lawtel ding ahi. Hiai bang kisikna hinkhua leh hinkhua a sinlai tampi mu leh la thei dingin simtute Toupa'n hon vualzawl hen.



PCF Huang

NAUPANG SUNDAY SKUL TOH KISAI

Tukum May 20-21, 2017 sung Rayburn College Auditorium leh Rayburn High School a Nipi Skul Sinsaktute ading in training neih ahi. Hiai training neihna tungtawna hongpiang khia, isaptuam in Nipi Skul (abik a Naupanglam) in atup leh ngim ding leh Nipi Skul a sinding a bikhiah bang zah hiam Toupa hon piak te taklatna inei ding. Hiai pen Pathian in lem honsakpilh leh maban abaih theilam in abu in hong kibawl ding a, Nipi Skul sinsaktu te ading in guide book hong hiding hi. Hiai anuai thute sim kha peuh in ngaihndan (suggestion) chiklel peuh in leng apiak theih ding.

A.SUNDAY/NIPI SKUL CURRICULUM (Sin ding a bikhiahte)

1. Sinlai (Lesson) sinsakna.

- a. Sinlai hoihtak a atheih ding ua sinsak ding.
- b. Naupangte Pathian thu “Tanchin Hoih” zaksak a Khrist kiang a pi ding.
- b. Bible thu theih sak a, ahinkhua ua zuihding thute muhsuhsak.
- c. A tunung hinkhua ding a hoihte sinsak.

2. Sinlai (Lesson) apan zuihding kawm muhna.

- a. Khrist batna nei a akhan ding uh.
- b. Naupangte missionary lungsim nei dia khansak ding
Hih dia hoih mahmah : Naupangte profile kaihkhawm a adinmun uh theihchet na tungtawn a pi ding

3. Sinlai (Lesson) apan sinkhiakte gahsuahna.

- a. Patna, hunkhakna thumna neihsak ding.
- b. Kidemna tuamtuam neihsak ding : Lasak, Bible tang gen, Thugen leh adg.
- c. Activities tuamtuam neih pih. Outing leh saptuam dang veh & adg.
- d. Piching a alut Chiang ua : Bible thu atheih ding uh. Khristian hinkhua nei a akhosak ding uh leh isaptuam doctrine tangpi a theih ua apom kip ding uh. (Mihing hihtheih hikei mahleh) Naupangte Hotdam kithei chian a piching a sawllut ding.
- e. Sinsakna pen agahsuah ngeingei ding ahi. Sinsaktu kia ihihlauh a, gahsuah sinsaktu ihih ding.

Hiai teng ban ah, Nipi Skul toh kisai theih ding tampi om ding, huaite leng abu a hong kibawl khiak Chiang in hong tel ding hi.

- Rev. M. Khamlianmang, Coordinator (Institutions)

TUALSUNG SAPTUAM LEH MISSIONS NASEPNA

Rev. M. Khamlianmang,
Coordinator (Institutions)

THUPATNA: Tualsung Saptuam chih igen chiang in ilungsim ua bang a om masa a? Biak Inn maw, gingu Biakinn a kikhom zelzete? Gingu omlou in tualsung saptuam a omthei kei ding. Ahihleh saptuam JesuKhrist in Matt.16:18 a “saptuam” a chih bang a genna hi ding a hia leh? Saptuam ichih tuh gingu pawlkhat Pathian beding leh phat ding, Khrist thupiak, hihding achihte (Baptisma tangsak ding bang, Toupa ankuang umkhawm zel ding bang), midangte kiang a Hotdamna thugen leh mangthangte zonga, a thu tangkou pih a, Neih leh lam, tha leh zung te itlou a pia a missionary sawlkhiate ahi chile’ng adik pen ding in kagingta.

Missions toh kisai igen chiang in kawkih nih anei thei. Khatna ah khovel vai a missions kizatna tuh sepding leh bawlding khat genna ahi (Etsakna : Government missions tuh Lampi, Tui leh Electrikt bawl masak). Nihna leh igen ut pen tuh – Kham vai a mission igen chiang in Saptuam Pawlpiten iseploh theihloh, akiphamawh mohpuakna (tavuan), huai tuh amangthang khate hotkhiatna nasep genna. Toupa Jesu Khrist nungzuite bawl na, a mangthang khate zonkhiak leh matna, a diakkhawl in mission field nasespna genna ahi.

**BANGZIAK A KHOVEL A
SAPTUAM PAWLPI OMA HIA
LEH?:**

Khovel a saptuam dinna san iteih loh chiang in isep ding bang kismekhalou in lamhah theih ahia chih phawk gige ding ahi. Saptuam dinkhiakna ziak khenkhatte:

1. Toupa Jesu Khrist deihna banga nasem ding in. Bang a hia adeihdan – leitung, khovel munteng a pai a, thilsiam tengkiang a tanchinhoih gen a, namteng kiang a tangthupha puangzak a nungzuite bawl ahi(Matt.28:18-20).
2. Mangthangte zong ding leh hunkhia dinga saptuam ding (Luke 19:10).
3. Jesu Khrist sep maban sem ding. (John 20:21).
4. Khovel a Chi leh Khuavak puak ding a saptuam om ihi (Matt.5:13-16).

5. Khovel tawp dong a athu theihpihte (witness) hi ding in (Nas.1:8).

6. Missions nasem ding a om. Saptuamte nasep ding lian leh gol pen Missions a hi.

Hiai tuang a thute tungtawn a imuh theih tuh hiai ahi. Saptuam te tuh missions nasepna ding in Khrist in akhuampi (Goldmine), nungzang-guh (back-bone), pumbuk-sembu dingte sekkhiatna mun, lemtup leh bawlina mun (factory bangbang) leh a sutpi (inlamna dia poimoh pen bang) ihi uh. Ahih leh bang ziak a missions nasem ding ihia?:

1. Sawla om leh mohpuakna na gol piak a omta te. Lei leh van a thuneipa hon sawl a hih man in (Mat.28:18-20).

2. Hiaina tuh paulam bawl theihlough leh dek theihlough nasepna (tavuan) ahi.

3. Saptuam pawlpi leh Missions nasepna a kikhen thei lou ahi.

4. Saptuam in Missions nna asepep kei leh Saptuam ahihna a bei leh amangthang ding hi.

5. Pathian in saptuam pawl kibawlte leh gingtu, Khristiante athu puangzaktu ding leh a vanzat a hon deih ahihman in.

Missions hoihtak a isep theihna ding in saptuam te bang chi om ding ihia?

1. Toupa Jesu Khrist thupiak mang peuhmah phot ding.

2. Missions hatsemna ding a thum ding, tawplou in.

3. Saptuam khat leh khat missions a

ding a ki-hanthawn, tha kipetuah (motivate & mobilize, equip) ding.

4. Hihtheihna (resources) ineihte itlou leh sitlou a kaikhawm leh thohkhia ding.

5. Saptuam mite missions a sem ding a hasuan leh sawkhia ding.

6. Saptuam mite missions tawh kisai sinsakna peding (educate).

7. Missions a ding a thungengen mai ding, kipumpiak ding, sum le pai peding, sawl ding leh kuankhia ding.

8. Sepkhit nailouh mun leh mual tampi omlai ahi chih phawkawm leh ei field te awlmoh ihih kawmkawm amidangte toh pangkhawm a sem ding a leng mansa a om ding.

Missions, huai tuh Midangte kiang ah, namdangte kiang a Tanchinhoih tangkou pihna nna isepna ding a theih dia poimoh khenkhatte:

1. Amasa pen in, Gam etna (Mission Field Survey), isaptuam in I septouh lellel pen thil poimoh mahmah leh kiphamawh ahi.

2. Missionary kuan dingte telna leh lakna (selection /recruitment) pilvang tak a bawl ding, hiai pen field survey toh paikahwm thei thil ahi.

3. Missionary a kuan dingte Training piak ngeingei ding.

4. Missionary a kuan khiate mah bang a a sawlte zong kipiakna kip leh detdou neih kiphamoh mahmah ding. Akuante kuhkal mahmah in asawlte lungkia mawk leh apai hoih

thei kei ding a, asawlte kithalop in kuhkal leh thanuam mahleh akuankhia te thulim kei leh leng a lohsam ding hiveve hi. Huaiziak in missions nasepna ah asawltu te leh akuamkhia te ki balance, pankhawm siam poimoh mahmah hi.

Saptuam pawlpi missions a ahath theihna ding a poimoh mahmah khenkhat te;

1. Saptuam heutute (Pastor, Rev.) missions vei leh lunglut tuntun, semut, gen peih ahih ding ahi.
2. Upa leh saptuam heutute (Elder, Deacon leh Committee khatpeuh a member) missions vei leh lunglut Pastorte hoihtak a zathuap thei ahih ding uh ahi.
3. Missionary te leh missions field vehna neih zelzel ding ahi.
4. Missions toh kisai thugen(sermon) neih zelzel ding ahi.
5. Inkuan kikhop, Nipi Skul leh small group thumkhawmna chihte

aleng missions subject heltel zelzel ding ahi.

THUKHITNA: Tanchinhoih Johan 4: 35 *“Nou, Buh lakna ding kha li a om lai, na chi uh hi lou hia? Ngai un kon hilh ahi, dak unla lou khawng en un, tu mahmahin lak dingin a min ahi”*. A achih bang in ibuhlak ding minta, alatu ding buhneipa kiang ah ngen in, I ngakngak nawn kei ding ua kuankhia in semni, hun tuibang kiam tawntung. Toupa'n a tatlam theiloute pikhia ding in itha leh zung, ineih bangbang suah khia in pan ila zomzellai ding uh.

Article, Laibu leh paper tuamtuum simna leh Lungsim tawng a om hong kigelh khia te Toupan simtute tengteng kiang ah avualzawl hon behlap sak hen.

By: Rev. M. Khamlianmang



Missions Huang

02. Mission Field Survey Team in September kha vel a a nihveina ding a zinkhiak nawn a, mission nasepna mun ding a koitak hoih pen ding hiam chih et dingin thupuk uhi.

03. Deacon O. Sana Tomba, B.Th sinlel panpihna khut zak a, phattuum ngaih suah, Rev. Khen P. Tombing (Rs. 1000), Rev. G. Pau Muanthang (Rs. 500), Rev. TS Thangta (Rs. 500) leh Bethsaida PC (Rs. 1000)-te tung ah kipahtu i gen hi. Huailou in Deac. Sana Tomba in Olive PC leh Rayburn PC te ah August 30 chiangin sharing va nei ding hi.